

069431

A88.113

~~000319~~

卷八



古今醫案按卷第八

黃德馨

吳江李齡壽辛垞重較輯

嘉善俞震東扶纂輯

男念祖永修較字

得璜礪溪

孫男掌明罔若全較

賂南貯賢

黃疸

東垣治一人年六十二素有脾胃虛損病目疾時作身面目睛俱黃小便或黃或白大便不調飲食減少氣短上氣怠惰嗜卧四肢不收至六月中目疾復作醫以瀉肝散下數行而前疾增劇李謂大黃牽牛雖除溼熱而不能走經絡下咽不入肝經先入胃中大黃苦寒重虛其胃牽牛其味至辛能瀉氣重虛肺本嗽大作蓋標實不去本愈虛甚加之適當暑雨之際素有黃證之人所以增劇也此當于脾胃肺之本臟瀉外經中之溼熱製

清神益氣湯主之。茯苓升麻各二分。澤瀉蒼朮防風各三分。生薑四分。此藥能走經除溼熱而不守。故不瀉本臟。補肺與脾胃本臟中氣之虛弱。青皮一分。橘皮生甘草白芍藥白朮各二分。人參五分。此藥皆能守本而不走經。不走經者。不滋經絡中邪。守者。能補臟之元氣。黃蘗一分。麥冬二分。人參二分。五味子三分。此藥去時。令浮熱涇蒸。右都作一服。水二盞。煎至一盞。去渣。稍熱。空心服。火熾之極。金伏之際。而寒水絕體于此時也。故急救以生脉散。除其溼熱。以惡其太甚。肺欲收。心苦緩。皆酸以收之。心火盛。則甘以瀉之。故人參之甘。佐以五味子之酸。孫思邈云。夏月常服五味子。以補五臟氣。是也。麥門冬之微苦寒。能滋水之源。于金之位。而清肅肺氣。又能除火刑金之嗽。而斂其痰邪。復微加黃蘗之苦寒。以為守位。滋水之流。以鎮墜其浮氣。而除兩足之痿弱也。

震按此案講得冗雜不清。藥又太輕。豈能取效。然尚屬純正道理。亦頗有發明處。故選之。

羅謙甫治兀顏正卿。二月間因官事勞役，飲食不節，心火乘脾，脾氣虛弱。又以恚怒，氣逆傷肝，心下痞滿，四肢困倦，身體麻木，次傳身目，俱黃微見青色，顏黑，心神煩亂，怔忡不安，兀兀欲吐，口惡生冷，飲食遲化，時下完穀，小便癃閉而赤黑，辰巳間發熱，日暮則止。至四月，尤盛。羅診其脈浮而緩，金匱要略云：寸口脈浮而風，緩為脾痺，非中風。四肢苦煩，脾色必黃，瘕熱以行，趺陽脈緊為傷脾，風寒相搏，食穀則眩，穀氣不消，胃中苦濁，濁氣下流，小便不通，陰被其寒，熱流膀胱，身體盡黃。名曰穀疸。以茵陳葉一錢，茯苓五分，梔子仁、蒼朮去皮炒、白朮各三錢，生黃芩六分，黃連、枳實、猪苓去皮、澤瀉、陳皮、漢防己各二分，青皮去白一分，作一服，以長流水三盞煎至一盞，名曰茯苓梔子茵陳湯。一服減半，二服良愈。內經云：熱淫于內，治以酸寒，佐以苦甘，又溼化于火，熱反勝之，治以苦寒，以苦泄之，以淡滲之。梔子茵陳苦寒，能瀉溼熱而退其黃，故以為君。難經云：苦主心下滿，以黃連、枳實苦寒，泄心下痞滿，肺主氣，令熱傷其氣，故身體麻木，以黃芩苦寒，瀉

火補氣。故以為臣。二朮苦甘溫。青皮苦辛溫。能除胃中溼熱。泄其壅滯。養其正氣。漢防已苦寒。能去十二經留溼。澤瀉鹹平。茯苓猪苓甘平。導膀胱中熱利小便而去癰閉也。

至元丙寅六月時雨霖霪。人多病溼溫。真定韓君祥因勞役過度。渴飲涼茶及食冷物。遂病頭痛。肢節亦疼。身體沉重。胸滿不食。自以為外感內傷。用通聖散二服。加身體困甚。醫以百解散發其汗。越四日。以小柴胡湯二服。復加煩熱躁渴。又六日。以三一承氣湯下之。躁渴尤甚。又投白虎加人參柴胡飲子之類。病愈增。又易醫用黃連解毒湯。硃砂膏。至寶丹之類。至十七日後。病勢轉增。傳變身目俱黃。肢體沉重。背惡寒。皮膚冷。心下痞硬。按之則痛。眼澁不欲開。目睛不了了。懶言語。自汗。小便利。大便秘。而不了。羅診其脉。緊細。按之空虛。兩寸脉短不及本位。此證得之因。時熱而多飲冷。加以寒涼寒藥過度。助水乘心。反來侮土。先囚其母。後薄其子。經云。薄所不勝。乘所勝也。時值霖雨。乃寒溼相合。此為陰證發黃明矣。羅以茵陳

附子乾薑湯主之內經云寒淫于內治以甘熱佐以苦辛溼淫所勝平以苦熱以淡滲之以苦燥之附子乾薑辛甘大熱散其中寒故以為主半夏草豆蔻辛熱白朮陳皮苦甘溫健脾燥溼故以為臣生薑辛溫以散之澤瀉甘平以滲之枳實苦微寒泄其痞滿茵陳苦微寒其氣輕浮佐以薑附能去膚腠間寒溼而退其黃故為佐使也煎服一兩前證減半再服悉去又與理中湯服之數日氣得平復或者難曰發黃皆以為熱今暑隆盛之時又以熱藥治之而愈何也羅曰主乎理耳成無已云陰症有二一者始外傷寒邪陰經受之或因食冷物傷太陽經也一者始得陽證以寒治之寒涼過度變陽為陰也今君祥因天令暑熱冷物傷脾過服寒涼陰氣大勝陽氣欲絕加以陰雨寒溼相合發而為黃也仲景所謂當于寒溼中求之李思順云解之而寒涼過劑瀉之而逐寇傷君正以此耳聖賢之制豈敢越哉或曰潔古之學有自來矣

震按此二案前係溼熱後係溼寒病固易辨而論治論藥悉本內經由

其學有根柢也

虞天民治一人年三十餘得穀疸證求治以胃苓湯去桂加茵陳數十貼黃退自以為安不服藥十數日後至晚目盲不見物虞曰此名雀目蓋溼痰盛而肝火有餘也用獺猪肝煮孰和夜明砂作丸服之目明如故來謝虞曰未也不早服制肝補脾消痰之劑必成蠱脹伊不信半月後服漸脹痞滿復求治仍以胃苓湯倍二朮加木通麥冬煎湯下褪金丸一月而安

江篁南治猶子三陽患疸證皮膚目睛皆黃小溲赤左脉弦而數右三部原不應指今重按之隱隱然指下證見午後發熱五更方退以茵陳五苓散除桂加當歸梔子黃檗柴胡數服繼用人參養榮湯乃八物除芎加芪陳皮五味姜棗兼人乳童溲熱退三日已而復作間日發于午後肌熱灼指脉近弦乃作瘧治之而愈後數年復患目睛黃午飯難剋化則小溲黃以黃芪建中湯除桂加白朮陳皮茯苓半夏神麩麥牙薑少許而退

震按此二案治法皆平易中正但前之鼓脹後之疸症皆新病不因久

病致變故與所用諸方恰合

繆仲淳曰太學顧仲恭遭鼓盆之戚復患病在床一醫診視驚訝而出謂其旦晚就木因延予診之左手三部俱平和右手尺寸亦無恙獨關部杳然不見諦視其形色雖尫羸而神氣安靜予詢之曾大怒乎曰然予曰此怒則氣併于肝而脾土受邪之證也經云大怒則形氣絕而况一部之脉乎甚不足怪第脾家有積滯目中微帶黃色恐成黃疸兩三日後果遍體發黃服茵陳利水平肝順氣藥數劑而痊

震按金匱要略云病疸當以十八日為期治之十日已上瘥反劇者為難治就余生平所驗分毫不爽有先因他病而後發黃者有先發黃而後現他病者必於半月一月之內退盡其黃則他病亦可治設或他病先瘥而黃不能退至一年半載仍黃者必復現他病以致死大抵酒傷及有鬱結與胃脘痛皆發黃之根基而泄瀉腫脹不食乃發黃之末路若時行病發黃亦多死諺所謂瘟黃也惟元氣實者審其為瘀血為溼

熱逐之清之得黃退熱亦退乃可無虞古人醫案俱未有說及久黃者
可為余言之。一證即如此條關脉不見亦云數劑而痊要知因於大怒
偶然不見耳若並未動怒關脉連日不見目中微帶黃色即為脾絕之
徵死無疑矣

身痒

倪仲賢治吳陵盛架閣內子。左右肩背上下患痒至兩臂頭面皆然。屢以
艾灼痒處暫止復作。如是數年。老人切其脉曰左關浮盛右口沉實。此酒
食滋味所致也。投以清熱化食行滯之劑。其痒遂止。

江汝潔治一婦人。患上身至頭面俱痒刺痛起塊。眾醫皆謂大風等證。江
診得左手三部俱細右手三部皆微實。大都六脉俱數。經曰微者為虛弱
者為虛。細者氣血俱虛。蓋心主血肝臟血乃血虛無疑。腎藏精屬水其部
見微乃為水不足。水既不足相火妄行無制。以致此疾。經曰諸痛瘡痒皆
屬心火。右手寸脉實實者陽也。脉經曰諸陽為熱。乃熱在肺。分火剋金。故

也。且肺主皮毛。皮毛之疾。肺氣主之。胸膈及皮毛之疾。為至高之疾也。右關微實。乃火在土。分土得火。則燥。肌肉之間。脾氣主之。肌肉及皮毛痛痒。皆火熱在上明矣。右尺微實。火居火位。兩火合明。陽多陰少。治宜補水以制火。養金以伐木。若作風治。未免以火濟火。以燥益燥也。乃以生地白芍各一錢。參芪各六分。連翹丹皮各六分。麥冬八分。槲皮防風甘草各四分。五味子九粒。黃連四分。水煎溫服。查內加苦參一兩。再煎洗十數劑而安。立齋治一女子十二歲。善怒。遍身作痒。用柴胡川芎山梔芍藥以清肝火。生地當歸黃芩以涼肝血。白朮茯苓甘草以健脾。上而愈。半載後。遍身起赤痕。或時眩暈。此肝火熾甚。血得熱而妄行。是夜果經至。

意庵治一人。因田間收稻。忽然遍身痒入骨髓。用食鹽九錢。泡湯三碗。每進一碗。撲而吐之。如是者三。而痒釋矣。

一小兒遍身作痒。以生薑搗爛。以布包擦之。而止。

震按河間謂痒為美疾。以其搔爬有趣。且與身命無傷也。然亦有屢治

不效者以不得病因而漫以涼血祛風為治耳。今觀倪江薛三案見解用藥俱精細周到可見昔賢雖遇輕證亦不肯匆心畧。

麻木

東垣治一婦麻木六脉中俱得弦洪緩相合。按之無力。弦在其上。是風熱下陷入陰中。陽道不行。其證閉目則渾身麻木。晝減夜甚。覺而目開則麻木漸退。久乃止。懼而不睡。身體重時有痰嗽。覺胸中常有痰而不利。時煩躁氣短促而喘。肌膚充盛。飲食二便如常。惟畏麻木不敢合眼為最苦。李曰。麻木為風。皆以為然。然如久坐而起亦有麻木。喻如繩縛之人。釋之則麻作。良久自己。此非風邪。乃氣不行也。經云。陽病瞋目而動。輕陰病閉目而靜。重靈樞云。開目則陽道行。陽氣遍佈周身。閉目則陽道閉而不行。如晝夜之分。以此知其陽衰而陰旺也。時痰嗽者。秋涼在外而溼在上也。身重脉緩者。溼氣伏匿於脾也。時煩躁者。經脉中陰火乘其陽分也。法當升陽助氣。益血微瀉陰火。去溼通行經脉。調其陰陽則已。非臟腑之本有邪。

也黃芪五分。人參三分。甘草炙四分。生一分。陳皮歸身各二分。佛耳草四分。白芍三分。草薺蒼朮各一分半。白朮二分。黃檗酒洗。苓澤升麻各一分。水煎服八貼而愈。名曰補氣升陽和中湯。

一人年七旬。病體熱麻。股膝無力。飲食有汗。妄喜笑。善飢。痰涎不利。舌強難言。聲嗄不鳴。李診脉。左手洪大。而有力。是邪熱客於經絡之中也。二臂外有數癥。問其故。對以燃香所致。李曰。君病皆由此也。人身經脉。手之三陽。從手表上行於頭。加以火邪。陽併於陽。勢甚熾焉。故邪熱妄行。流散於周身。而為熱麻。熱傷元氣。則沉重無力。熱泄衛氣。則多汗。心火盛。則妄喜笑。脾胃熱。則消穀善肌。肺金衰。則聲不鳴。仲景所謂因火為邪。焦骨傷筋。血難復也。內經云。熱淫所勝。治以苦寒。佐以苦甘。以甘瀉之。以酸收之。用黃檗知母之苦寒。為君。以瀉火邪。壯筋骨。又腎欲堅。急食苦以堅之。黃芪生甘草之甘寒。瀉熱補表。五味子酸。止汗補肺氣之不足。以為臣。炙草當歸之甘辛。和血潤燥。升柴之苦平。行少陽陽明二經。自地升天。以苦發之者也。

以為佐。命其方曰清陽補氣湯。又繆刺四肢以瀉諸陽之本。使十二經絡相接而泄火邪。不旬日而愈。

震按東垣論病悉本內經簡明確切能發其所以然之故。用藥亦本內經以藥性氣味配合臟腑經絡絕無粉飾閒詞而軒岐要旨昭然若揭誠非輓近可及第藥止一二分至四五分何太少耶。豈以氣味配合得當機靈而徑捷耶。後賢常云願學仲景不學東垣。然東垣以極輕之分兩能愈疑難之久病亦正易學。

吳芟山治一婦。夏月乘涼夜多失蓋。因得冷風入骨。兩足麻木疼痛不已。服祛風止痛藥不效。與大防風湯數服。其疾漸輕。仍以烏頭粥服。三晨而愈。震按上二案所用諸藥細膩熨貼。此案所用二方直捷爽快。俱與病情相合。遂各見其妙。

李士材治文學陸文湖。兩足麻木。自服活血之劑不效。改服攻痰之劑。又不效。經半載後。兩手亦麻。左脇下有尺許不知痛痒。李曰。此經所謂着痺。

也。六脉大而無力，氣血皆損，用神效黃芪湯，加茯苓、白朮，當歸、地黃十劑後，小有效，更用十全大補五十餘劑始安。

少宰蔣恬菴手足麻痺，目中覩一成兩服，補血藥不應，改服脾藥，精神困倦，李診得寸口脉大，兩尺獨澀，此心腎不交，水泛為痰之故也，乃取地黃丸料作煎劑，倍用澤瀉、茯苓，入青鹽少許，凡六劑而岐視遂收，乃兼進參芪安神之劑，一月而康復如常。

震按上條氣血兼補原係古人成法，此條用地黃湯因兩尺脉澀，故先補腎，繼以參芪，仍是治麻成法。後案張公以參湯下紫雪，則別有洞天矣。由其病根在痰火也，開眼則麻確是東垣對面文章，講得最好。

張路玉治洋客巴慈明婦，產後眩暈，心悸，神魂離散，若失藏府之狀，開眼則遍體麻木，如在雲霧中，必緊閉其目，似覺稍可，晝日煩躁，夜則安靜，專事女科者，用四物等血藥，則嘔逆不食，更一醫用薑附等熱藥，則躁擾不寧，其脉虛大而數，按之則散，舉之應指，此心火浮散之象，因艱產受驚，痰

飲乘虛襲入心包絡中留伏膈上有入無出所以綿延不已蓋目閉則諸竅皆閉痰火堵塞心竅所以神識無主目閉則諸竅皆閉痰火潛伏不行故得稍安與東垣所言合眼則陽氣不行之麻木迥殊况晝甚夜輕明是上焦陽位之病與理痰清火之劑諸證漸寧然或因驚恐或因飲食不時舉發此伏匿膈上之痰無從搜滌也乘發時用獨參湯下紫雪開通膈膜仍與前藥調補半載而康

震按麻多在於手足者以四末道遠氣餒則衛行遲而難到也故麻不兼木必屬氣虛否則風痰凡脉浮而軟或大而弱者氣虛也脉浮而滑按之不長者風痰也若麻木兼作則有寒溼積痰死血之殊其脉有沉遲滑實與沉澹而芤之分矣宜詳辨之

痛風

東垣治一人冬時忽有風氣暴至六脉弦甚按之洪大有力其證手攣急大便秘澀面赤熱此風寒始至于身也四肢者脾也以風寒之邪傷之則搖

而攣痺。乃風淫未疾而寒在外也。內經曰寒則筋攣。正謂此也。素飲酒內有實熱。乘于腸胃之間。故大便秘澀而面赤熱。內則手足陽明受邪。外則足太陰脾經受風寒之邪。用桂枝二錢甘草一錢以卻其寒邪而緩其急。縮黃檗二錢苦寒滑以瀉實潤燥。急救腎水。升麻葛根各一錢以升陽氣。行手陽明之經。不令遏絕。桂枝辛熱入手陽明之經為引用。潤燥復以甘草專補脾氣。使不受風寒之邪。而退賊邪。專益肺經也。佐以人參補氣當歸和血潤燥。作一貼。水煎服。令煖房中摩搓其手。遂安。

震按此案寒熱補散並用。恰與標本俱合。但東垣立方分兩甚輕。此卻重用者。蓋以風寒大病逐邪宜急。不比他證調理脾胃。只取輕清以升發元氣也。

丹溪治一少年患血痢。用澁藥取效。致痛風叫號。此惡血入經絡也。血受溼熱久必凝濁。所下未盡。留滯隧道。所以作痛。久則必成枯細。與四物湯加桃仁紅花牛膝黃芩陳皮生甘草煎入生薑汁研潛行散入少酒飲之。

數十貼。又刺委中。出黑血三合而安。

震按此是痢後痛風其法至今傳用。但因瀦藥留滯溼熱以成瘀血。故用此方。倘又有別因者。不得以此概論。

一人貧勞。秋深渾身發熱。手足皆疼。如燬晝輕夜重。服風藥愈。痛氣藥不效。脉瀦而數。右甚于左。飲食如常。形瘦如削。蓋大痛而瘦。非病致也。用蒼朮酒黃檗各一錢五分。生附一片。生甘草三分。麻黃五分。研桃仁九個。煎入薑汁。令辣熱服四貼。去附加牛膝一錢。八貼後氣喘促。不得眠。痛畧減。意其血虛。因多服麻黃。陽虛被發動。而上奔。當補血鎮墜。以酸收之。遂以四物湯減川芎。倍芍藥。加人參二錢。五味子十二粒。與二貼定。三日後數脉減大半。瀦如舊。仍痛。以四物加牛膝。參朮。桃仁。陳皮。甘草。栝榔。生薑三片。五十貼而安。後因負重復痛。再與前藥加黃芪三分。又二十貼愈。

震按身發熱疼。如燬脉瀦而數。右甚於左。應屬血虛有熱。所謂熱痺證也。宜用生地。龜板。天冬。黃檗。丹皮。黑梔。秦艽。防己。牛膝。紅花。銀花。木通。

等藥可愈。或仲景梔子檳皮湯大劑與之亦佳。若二妙之蒼朮已不相宜。附子一片何用。麻黃五分太過。至因多服麻黃。虛陽上升而喘。議與酸收是矣。遽用人參二錢竊恐痺痛轉增。然云喘定數脉大減。異哉。或者脉數無力耶。則前之麻黃已悞。後之桃仁檳榔義又何居。予素服膺丹溪。此則不敢阿其所好也。再閱下案。講究病因。傳變道理。真不可及矣。

一人患背胛縫一線痛起。上跨骨。至胸前側脇而止。晝夜不住。脉弦而數。重取左豁大于右。意其背胛小腸經。胸脇膽經也。必思膚傷心。心藏未病而小腸府先病。故痛從背胛起。及慮不能決。乃歸之膽。故痛至胸脇。乃小腸火乘膽木。子來乘母。是為實邪。詢之果因謀事不遂而病。用人參四分。木通二分。煎湯使吞。龍膽丸數服而愈。

一壯年厚味多怒。秋間于髀樞左右發痛一點。延及膝髁。痛處惡寒。晝靜夜劇。口或渴。膈或痞。醫用補血及風藥。至次年春痛甚。食減形瘦。膝腫如椀。脉弦大頗實。寸澹甚。大率皆數。小便數而短。作飲食痰積在太陰陽明。

治之以酒炒黃檗一兩。生甘草稍。犀角屑。鹽炒蒼朮各三錢。川芎二錢。陳皮。牛膝。木通。芍藥各五錢。遇暄熱加黃芩二錢為末。每三錢與薑汁同研細煎。令帶熟食。前服之。日夜四次。半月後脉減病輕。去犀角。加牛膝。龜板。歸身。尾各五錢。如前服。又半月。腫減食增不惡寒。惟脚痿軟。去蒼朮。黃芩。夏加草。檉一兩五錢。餘依本方內加牛膝。因中年加生地黃五錢。冬加桂枝。茱萸。病遂愈。仍絕酒肉。溼麵胡椒。

震按此案現証甚雜而作飲食痰積在太陰陽明治誠為扼要之論然方中無消食消痰藥想以醞酒厚味釀成溼熱耳故溼熱與風寒乃痺證兩大綱

一人項強動則微痛脉弦而數實右為甚作痰熱客太陽經治之以二陳湯加酒洗黃芩羌活紅花而愈

一村夫背偃僂足攣成廢疾脉沉弦而澹以煨腎散與之上吐下瀉過一月又行一次凡三四貼而愈

一人溼氣脚攣拳伸不直用當歸拈痛湯加杜仲黃檗川芎白朮甘草枳殼愈。

震按此三條亦皆從溼熱治但因所兼之證而變換其藥仍是殊途同歸也

薛立齋治一婦人自汗盜汗發熱晡熱體倦少食月經不調吐痰甚多已二年矣遍身作痛天陰風雨益甚用小續命湯而痛止用補中益氣加味歸脾湯三十餘劑諸證悉愈此皆鬱結傷脾不能輸養諸藏所致故用前一湯專主脾胃若用寒涼降火理氣化痰復傷生氣多致不起

一婦人因怒月經去多發熱作渴左目緊小頭項動掉四肢抽搐遍身疼痛此怒動肝火肝血虛而内生風用加味道遙加鈎藤數劑諸證漸愈又八珍湯調理而安

一婦人歷節作痛發熱作渴飲食少思月經過期諸藥不應脉洪大按之微細用附子八物四劑而痛止用加味道遙而元氣復六味丸而月經調

一婦體胖素內熱月經失調患痛風下身微腫痛甚小便頻數身重脉緩證屬風溼而血虛有熱先用羌活勝溼湯四劑腫漸愈用清燥湯數劑小便漸清用加味逍遙十餘劑內熱漸愈為飲食停滯發熱仍痛面目浮腫用六君子加柴胡升麻而愈又因怒氣小腹痞悶寒熱嘔吐此木侮脾土用前藥加山梔木香而安惟小腹下墜似欲去後此脾氣下陷用補中益氣而愈後因勞役怒氣作嘔吐痰遍身腫痛月經忽來寒熱用六君子加柴胡山梔以扶元氣清肝火腫痛嘔吐悉退用補中益氣以升陽氣健營氣月經寒熱漸瘥

震按此四案即於暗中摸索亦知為薛派治法然而散風寒補元氣勝溼清燥滋肝益腎平補溫補諸法畢具誠為對證發藥之良工也

汪石山治一婦年踰五十左腳膝攣痛不能履地夜甚于晝小腹亦或作痛診其脉浮細緩弱按之無力尺脉尤甚病屬血衰遂以四物湯加牛膝紅花黃芩烏藥連進十餘貼而安

震按石山亦長於補如此案之脉人盡知其宜補矣投以此方恐病深藥淺豈能十餘劑而安乎

韓飛霞治一都司因哭弟成疾飲食全絕筋骨百節皮膚無處不痛而腰為甚一云腎虛宜補或云風寒宜散韓曰此亦危證其脉濇正東垣所謂非十二經中正疾乃經絡奇邪也必多憂愁轉抑而成若痰上殆矣補則氣滯散則氣耗乃主以清燥湯連進三甌遂因睡至五鼓無痰覺少解脉之減十之三遂專用清燥湯加減與之十劑而愈

震按此證甚危此論甚佳乃以清燥湯一方收功者蓋五志過極皆為火鬱此方連藥以清火蒼麩以散鬱鬱熱能蒸溼二苓澤瀉以滲溼溼熱甚則脾土衰二朮人參以助脾補元溼熱勝則肺金困參芪麥冬五味助金以制木使不生火又火亢者水必虧故兼歸地養血再合升柴之升清苓瀉之降濁恰與經絡奇邪相合所謂奇邪者乃奇經之邪故云非十二經中正疾也

吳芟山治一男子瘦弱因卧卑溼之地遂頭目眩暈畏見日光寒熱時作四肢歷節疼痛或作風治或作虛治將及半年俱不效吳診脉曰寸口脉沉而滑兩尺弦此溢飲溼痰也當汗吐之雖虛羸不當用補藥乃以控涎丹一服卻用曝乾棉子一斗燃之以被圍之勿令氣泄使患人坐熏良久倏然吐出黑痰升許大汗如雨痛止身輕病遂愈

震按此係痺痛之由於痰飲者葉氏醫案亦曾用之

李士材治鹽賈葉作舟遍體疼痛尻髀皆腫足膝攣急曰此寒傷榮血筋脉為之引急內經所謂痛痺也用烏藥順氣散七劑而減更加白朮桂枝一月而愈

震按此案用溫燥發散藥乃風寒溼三氣成痺正治法

孫東宿治行人孫質菴患痛風手足節骭腫痛更甚痛處熱飲食少診之脉皆弦細而數面青肌瘦大小腿肉皆削曰此病得之稟氣弱下虛多內以傷其陰也在燕地又多寒經云氣主煦之血主濡之今陰血虛則筋失

養故營不榮于中。氣為寒束。百骸拘攣。故衛不衛于外。榮衛不行。故肢節腫痛而熱。病名周痺是也。治當養血舒筋。流溼潤燥。俟痛止後。繼以大補陰血之劑。實其下元可也。乃以五加皮。蒼朮。黃檗。蒼耳子。當歸。紅花。苾仁。羌活。防風。秦艽。紫荊皮。二十劑。而筋漸舒。腫漸消。痛減大半。更以生地。龜板。牛膝。當歸。蒼朮。黃檗。晚蠶沙。蒼耳子。秦艽。苾仁。海桐皮。三十劑。而腫痛全減。行人大喜。孫曰。公下元虛憊。非歲月不能充實。須痛戒酒色。則培補乃效。丸方以仙茅為君。人參。鹿角膠。虎脛骨。枸杞。牛膝。為臣。熟地。茯苓。黃檗。蒼耳子。晚蠶沙。為佐。桂心。秦艽。澤瀉。為使。蜜丸。服百日。腿肉長完。精神復舊。

震按此案論治處方俱極精當。葉案有藍本于此者。

文學閔唇樓令室。軀肥性躁。患痛風。痛處略腫。呻吟喊叫。手足不能舉動。醫用歸芍地黃人參牛膝之類。其痛愈加。已逾七月。東宿曰。此乃溼痰凝滯。經絡作痛。須以燥溼流動之劑。踈決一番。但初服不效。須十貼見功耳。

因用二陳加烏藥葉蒼朮殭蠶海桐皮南星至六七貼痛如故乃以芫花醋炒過三分海金沙一分為末白湯送下至晚瀉一次下稠痰半盆足痛減大半稍能動止更後腹中大痛而厥冷汗淋漓面青息斷舉家以為死矣執而診之手冷如冰但六脉俱在惟沉伏耳知其為痛極使然用生薑湯灌之而甦語侍女曰適來腹中痛甚耳後火光濺出肛門如焚大嚮一聲不知瀉下何物衆看之乃血鯁一條長六寸濶半寸餘鱗目俱在盆中尚能遊動衆皆悚駭此證本由痰作治者特為行痰初不知其有蟲如是第藥中有芫花乃殺蟲物故偶中耳次日手足皆能動仍以二陳湯加苡仁紅花五加皮四貼脫然

震按此案末藥方甚佳所謂若藥不瞑眩厥疾不瘳也然其痛並不由於蟲蟲下之時必痰血俱下故得愈耳且云血鯁則為溼熱蒸其瘀血所成復何疑耶

祝茹穹治閨閣典試半月前忽腿疼兩腳筋縮腳跟縮粘至腿寸步不能

行。將一月。屢藥無效。咸以此為痿痺證。祝曰：非也。察其脉左寸忽洪，忽澁，遲數無定。棲因此人好飲冷酒，酒新則性熱燥，冷飲又犯寒溼。寒熱相搏，遂有此病。乃以川烏二錢，去皮臍；麻黃二錢，二股，稍一；股根蒼朮一錢，以甘草汁拌炒；白蒺藜一錢，去刺；酒蒸熟，焙乾，同為末。每服一錢二分，用老酒熱沖服。蓋被出汗，一服即能行動，三服愈。

震按此病甚重，所用川烏、麻黃雖屬狠藥，然以治痛風亦甚。平常恐未必速效至此。

附葉天士先生治嘉善周姓，體厚色蒼，患痛風，膝熱而足冷，痛處皆腫，夜間痛甚，發之甚時，顛頂如芒刺，根根髮孔覺火炎出，遍身躁熱不安，小便赤澀，口不乾渴，脉沉細，帶數用生黃芪五錢，生於朮三錢，熟附子七分，獨活五分，北細辛三分，漢防己一錢，五苓散四劑，而諸證皆痊。惟腫痛久不愈，陽痿不舉，接用知檠、虎膝、龜板、從蓉、牛膝，不應改用烏頭全蠍各一兩，穿山甲、川檠各五錢，漢防己一兩，五錢麝香三錢，馬料豆生。

用二兩茵陳湯泛丸每服一錢開水下而全愈震按此與指南所載治
鮑姓周痺用蜣螂全蝎地龍穿山甲蜂房川烏麝香乳香以無灰酒煮
黑大豆汁法丸者各有妙義非淺見寡聞者所能窺測後張路玉案用
安腎丸亦有巧思又與葉案之蠲痛丹木防已湯諸方可謂同宮異曲
張路玉治包山勞俊卿年高攣廢山中諸醫用木瓜獨活防已希發威靈
仙之類將半年餘乃致跬步不能動移或令服八味丸亦不應診其脉尺
中微浮而細時當九夏自膝至足皆寒冷如從水中出知為腎虛風雨所
犯而成是疾遂授安腎丸終劑而能步履連服二料絕無痿弱之狀矣

痿

東垣治一人壯年病腳膝痿弱臍下尻臀皆冷陰汗臊臭精滑不固或以
鹿茸丸治不效李診之脉沉數而有力卽以滋腎丸治之以寒因熱用引
入下焦適其病所瀉命門相火之勝再服而愈

震按陰汗臊臭精滑不固脉沉數有力顯係下焦溼熱東垣自云瀉其

相火之勝所謂腎熱則骨痿也

丹溪治一人形肥味厚多憂怒脉常沉澹春病痰氣醫以為虛寒用燥熱香竄之藥至夏兩足弱氣上衝食減朱曰此熱鬱而脾虛痿厥之證作矣形肥而脉沉未是死證但藥邪太盛當此火旺之令實難求生且與竹瀝下白朮膏盡二飭氣降食進至一月後仍大汗而死書此為誤藥之戒

震按氣衝即是喘逆又復食減病已重矣况兼兩足弱乎此下虛上盛之候其謂形肥而脉沉未是死證即平脉篇肥人責浮之義蓋指脉非應死之脉實死於藥也

滑伯仁治一婦始病瘧當夏月醫以脾寒胃弱久服桂附等藥後瘧雖退而積火燔熾致消穀善飢日數十飯猶不足終日端坐如常人第目昏不能視足弱不能履腰膝困軟肌肉虛肥至初冬伯仁診之脉洪大而虛濡曰此痿證也長夏過服熱藥所致蓋夏令溼當權剛劑太過火溼俱甚肺熱葉焦故兩足痿易而不為用也遂以東垣長夏溼熱成痿之法治之日

食益減目漸能視至冬末忽下榻行步如故

震按東垣長夏溼熱成痿法即清燥湯也用於此證最妥合上案觀之可謂喜用辛燥熱藥者戒

石山治一人因久坐腰痛漸次痛延右脚及左脚又延及左右手不能行動或作風治而用藥酒或作血虛而用四物一嚙卽痛蓋覆稍熱及用針砭痛甚煎服熟地黃或吞虎潛丸又加右齒及面痛甚季秋汪診之脉濡緩而弱左脉比右較小或濇尺脉尤弱曰此痿證也彼謂痿證不當痛汪曰諸痿皆起于肺熱君善飲則肺熱可知經云治痿獨取陽明陽明者胃也胃主四肢豈特脚耶痿兼溼重者則筋緩而痿軟兼熱多者則筋急而作痛因檢橘泉傳示之始信痿亦有痛又經云酒客不喜甘熟地味甘而虎潛丸益之以蜜則甘多助溼而動胃火故右齒面痛也遂以人參二錢黃芪一錢五分白朮伏苓生地黃麥門冬各一錢歸身八分黃檗知母各七分甘草四分煎服五貼病除彼遂棄藥季冬復病仍服前方而愈

震按此案講病最精用藥則未敢深信既云熱多者筋急而痛且現在右齒面痛何以重用參芪甘溫之藥其些微之知槩寧有益耶

一人形肥色黑素畏熱而好飲年三十餘忽病自汗如雨四肢俱痿且惡寒小便短赤大便或溏或結飲食亦減醫作風治用獨活寄生湯小續命湯罔效仲夏汪視之脉沉細而數約有七至曰此痿證也丹溪云斷不可作風治經云痿有五皆起于肺熱只此一句便知其治之法矣經又云治痿獨取陽明蓋陽明胃與大腸也胃屬土肺屬金大腸亦屬陽金金賴土生土虧金失所養而不能下生水腎水涸火盛肺愈被傷况胃主四肢肺主皮毛今病四肢不舉者胃土虧也自汗如雨者肺金傷也故治痿之法獨取陽明而兼清肺經之熱正合東垣清燥湯服百貼果愈

震按脉沉細而數約有七至鬱熱深矣何不直清其熱而僅用清燥湯清補兼施之藥耶蓋痿本虛證加之自汗如雨飲食減少則肺胃愈虛故用此方補土以生金益水以制火治其本也連檠苦寒苓瀉淡滲治

其標也。古人治病審慎周到如此，亦知其必中，故能持久以收功。立齋治其師僉憲高如齋，自大同回，謂薛曰：余成風病矣，兩腿逸則痿軟，而無力，勞則作痛如針刺，脉洪數而有力。立齋曰：此肝腎陰虛，火盛而致痿軟無力，真病之形。作痛如錐，邪火之象也。用壯水益腎之劑而愈。高曰：向庸官，即皆以為風，恨無醫藥，若服風劑，豈不殆哉？

震按此脉洪數而有力，故用壯水益腎之藥。若脉數而無力，當用地黃湯合生脉散補血湯矣。下案二證虛象顯然，猶用風藥，死復何疑。

一男子足痿軟，日晡熱，薛曰：此足三陰虛，當用六味滋腎二丸補之。一婦人腿足無力，勞則倦怠，薛曰：四肢者土也，此屬脾虛，當用補中益氣及還少丹主之，俱不從其言，各執搜風天麻二丸，并愈風丹而殞。

江應宿北遊燕路過山東，孫上舍長子文學病瘵，延江診視，曰：無能為矣。經云：大肉已脫，九候雖調，猶死。而况于不調乎？時夏之半，六脉弦數，既泄且痢，脾傳之腎，謂之賊邪，病已極矣，不出八月，水土俱敗，至期而逝，敢辭。

孫曰內人請脉之形容豫順語音清亮不顯言何證診畢孫問何病江曰寸關洪數尺微欲絕足三陽脉逆而上行上實下虛此痿證也病雖久可治孫曰何因而得此江曰經云悲哀太過則胞絡絕胞絡絕則陽氣內動發則心下崩數澀血也大經空虛發為肌痺傳為脉痿有所失亡所求不得則發肺鳴鳴則肺熱葉焦發為痿躄此之謂也孫曰果因哭子憂傷兩脚軟弱無力不能起者七越歲矣或以風治而投香燥或認虛寒而與温補殊無寸效江曰溼熱成痿正合東垣清燥湯例但藥力差緩難圖速效以獨味杜仲空心酒水各半煎服日進清燥湯下潛行散兼旬出房門無何病瘳子死哀傷復作

震按上實下虛之病甚多何以知為痿證殆於形容豫順語音清亮而不起床可權衡以決之

附葛可久治同郡富人女年可十七八病四肢痿痺不能自食目瞪眾醫莫能治葛視之笑曰此不難治乃令悉去房中香匳流蘇之屬發地

板掘土為坎。畀女子其中。局其扉。戒家人俟其手足動而作聲。當報我。久之手足果動而呼。投藥一九。明日自坎中出矣。蓋此女平日嗜香。而脾為香氣所蝕。故也。震按香為脾臭。何以蝕脾。意者香能開竅。香極則諸竅大開。脉緩筋弛。闕健盡撤。故身軟目眩不食也。畀入土坎者。諸毒得土而化。且土為萬物之母。四肢百骸得土氣則生氣自復也。仍合治痿。獨取陽明之義。

李士材治太學朱修之。八年痿廢。累治不效。李診之。六脉有力。飲食如常。此實熱內蒸。心陽獨亢。證名脉痿。用承氣湯下。六七行。左足便能伸縮。再用大承氣。又下十餘行。手中可以持物。更用黃連黃芩各一斤。酒蒸。大黃八兩。蜜丸。日服四錢。以人參湯送。一月之內。去積滯不可勝數。四肢皆能展舒。李曰。今積滯盡矣。煎三才膏十觔。與之服。盡而應酬如故。

崇明倪君傳。四年不能起于床。日服之藥。寒涼十六。補腎肝者十三。李診其脉大而無力。此營衛交虛。以十全大補加秦艽熟附各一錢。朝服之。夕

用八味丸加牛膝杜仲遠志萆薢虎骨龜板黃蘗溫酒送七錢凡三月而
機關利

又治兵尊高懸圍患兩足痠軟神氣不足向服安神壯骨之藥不效改服
滋腎合二妙加牛膝苡仁之屬又不效純用血藥脾胃不實李診之脉皆
冲和按之亦不甚虛惟脾部重取之則澹而無力此土虛下陷不能制水
則溼氣墜于下焦故膝脛為患耳進補中益氣倍用升柴數日即愈夫脾
虛下陷之證若用牛膝下行之劑則愈陷而病愈甚矣

震按此三案精妙絕倫以藥對脉確切不移首案連用承氣繼用參湯
送寒下藥皆是獨取陽明治法末案補中益氣與大黃補瀉不同總歸
乎取陽明也臨證指南首列輕清治肺二方實宗肺熱成痿之旨第恐
力薄難效其用二妙茵陳草薢茯苓皮蠶沙海金沙防己膽草寒水石
等直清溼熱較之清燥湯反勝一籌不涉虛者允宜倣此又有治下虛
上實而用犀角地黃湯去芍藥加元參連翹桑葉鈎藤似乎專理上實

不顧下虛然云頭目如蒙入夏陽升為甚議清營熱以熄內風想其人
脉必弦數有熱甚生風之象未可兼顧下虛或他日再診而後滋填下
焦亦未可定至於滋填下焦方有用虎潛加減者有用四觔金剛健步
及地黄飲子加減者有用熟地從蓉巴戟遠志鹿角霜桑椹蒼朮小茴
以金毛脊酒蒸熟水熬膏為丸者有用從戟杞膝青鹽線膠茯苓沙苑
鹿筋膠羊肉膠牛骨髓猪脊髓者卻無參朮補陽明法亦無承氣瀉陽
明法惟脾腎雙補丸有人參然其案重在暈麻癱泄尚未痿厥非以治
痿也統觀之不外清溼熱益肝腎豈二種病情偏多耶或案有遺逸未
能詳備耶

癰瘕

史記曰臨菑女子薄吾病甚眾醫皆以為寒熱篤當死臣意診其病曰蟻
瘕為病腹大上膚黃粗循之戚戚然臣意飲以芫花一撮即出蟻可數升
病已三十日如故蟻得之寒溼寒溼氣鬱篤不發化為蟲臣意所以知薄

吾病者。切其脉。循其尺。其尺索刺粗。而毛美。奉髮是蟲氣也。其色澤者。中藏無邪氣及重病。

震按此條辨證最佳。上膚黃粗者。腹大而腹上膚黃粗也。循之戚戚然者。如以手摸老松樹皮之枯燥也。其尺索刺粗者。亦是枯燥之象。然倉公望毛髮潤美。面色又光澤。知為蟲病也。若齊中尉潘滿如病。小腹痛。謂之遺積。瘕病由於酒。且內當澁血死。一條不講證。但講脉辭。義古奧。難明。不敢因其講脉而錄之。

隨有患者。飢而吞食。至胸即便吐出。醫作噎膈。反胃治之。無驗。有老醫任度視之。曰。非此三疾。蓋因食蛇肉不消而致。但揣心腹上有蛇形也。病者曰。素有大風。常食蛇肉。風稍愈。復患此疾。遂以大黄芒硝飲之。而愈。此蛇瘕也。

附春夏間。蛇精及液沾菜上。人悞食之。腹内生蛇。須用赤頭蜈蚣一條。炙為末。分二服。酒下。

徐文伯善醫術。宋明帝宮人患腰痛，牽心發，則氣絕。眾醫以為肉瘕。文伯視之曰：「此髮瘕也。」以油灌之，即吐物如髮，稍引之，長三尺，頭已成蛇，能動。懸柱上，水瀝盡，惟餘一髮而已，遂愈。

附唐書載甄權弟立言善醫。時有尼明律，年六十餘，患心腹膨脹，身體羸瘦，已經二年。立言診之曰：「腹內有蟲，當是悞食髮為之耳。」因令服雄黃，須臾吐一蛇如手小指，惟有眼，燒之猶有髮氣，其疾乃愈。又一人好飲油，每飲四五升，方快意，乃悞吞髮入胃，血裏化為蟲也。亦用雄黃五錢，水調服愈。

乾德中，江浙間有慎道恭，肌瘦如勞，惟好食米，闕之則口出清水，情似憂思。食米頓便如常。眾醫莫辨，後遇蜀僧道廣，以雞屎及白米各半合，共炒為末，以水一盞調頓服。良久，病者吐出如米形，遂瘥。病源謂米瘕是也。

續搜神記載一人共奴俱患驚癘，奴前死，遂破其腹，得白驚尚活。有人乘馬來看驚，適白馬尿正落驚上，即縮頭尋復，以馬尿灌之，驚化為水。其主

曰我將瘥矣，卽服之，如言而愈。

附一人患蟹瘥，痛有來止，或食蟹卽痛，用雞屎一升，炒黃投酒中，浸一宿，焙為末，原浸酒調下而愈。

宣室志載永徽中崔爽者，每食生魚三斗乃足，後飢作膾，未成，忍飢不禁，遂吐一物如蝦蟆，自此不復能食膾矣。

太平御覽載元嘉中有人噉鴨肉，乃成瘥病，胸滿面赤，不得飲食，醫令服秫米，須臾煩悶，吐一鴨雛，身喙翅背已成就，惟左腳故綴，昔所食肉遂瘥。南史載褚澄治李道念，有冷痰五年，澄曰：汝病是食白淪雞子過多，取蒜一升，令煮服之，吐一物如升，涎裏之，乃是雞雛，羽翅爪距皆見，凡十三頭而病愈。

震按蛇蟹有毒，膾係生食，固有成瘥者。若食鴨肉與白淪雞子而生雛，將食猪肉者生小猪，食羊肉者生小羊乎，未可信也。

明皇雜錄載一黃門奉使交廣回，周顧謂曰：此人腹中有蛟龍，上驚問黃

門曰、卿有疾否、曰、臣馳馬大庾嶺時、大熱、因口渴、遂飲水、覺腹中堅痞如石、周用硝石、雄黃、煮服之、立吐一物、長數寸、大如指、鱗甲具、投之水中、俄頃長數尺、復以苦酒沃之、如故、以器覆之、明日已生一龍矣、上甚為之驚訝、

附廣異記載一患者、飲食如故、發則如癲、面色青黃、小腹脹滿、狀如妊孕、醫診其脉、與證皆異、而難明主療、忽有一山叟曰、聞開皇六年、灞橋人患此病、蓋因三月八日、水邊食芹菜、得之、有識者曰、此蛟龍瘕也、為龍游於芹菜之上、不幸食之、而病也、遂以寒食、飴、每劑五合、服之、數劑吐出一物、形雖小而狀似蛟龍、且有两頭、獲愈、

石藏用蜀人良醫也、名甚著、一士人嘗因承簷溜盥手、覺為物觸入指爪中、初若絲髮、然既數日、稍長如線、伸縮不能如常、始悟其為龍伏藏也、乃扣治療之方於石、石曰、此方書所不載、當以意去之、歸可末、蜣螂塗指、庶不深入胸膜、冀他日免震雷之患、士人如其言、後因迅雷、見火光遍身、士

人懼急以針穴指果見一物自針穴躍出不能災

名醫錄載汾州王氏得病右脇有聲如蝦蟆常欲手按之不則有聲聲相接羣醫莫能辨聞留陽山人趙巒善診求之趙曰此因驚氣入於臟腑不治而成疾故常作聲王氏曰因邊水行次有大蝦蟆躍高數尺驀作一聲予不覺驚叫便覺右脇牽痛自後作聲常似蝦蟆也巒乃引王氏脉訣右關脉伏結積病也。正當作積病治用六神丹泄下青涎類蝦蟆之衣遂瘥齊諧記云隆安中江夏安陸縣有人姓郭名坦得天行病後遂大善食一日消斗米家貧不能給行乞于市一日大飢不可忍人家後門有三畦薤因竊啗之盡兩畦便大悶極卧地須臾大吐吐一物如籠因出地漸小主人持飯出食之不復食因撮飯着所吐物之上卽化為水此病尋瘥。

桓宣武有一督將因時行病後虛熱便喜飲茗必一斛二斗乃飽裁減升合便以為大不足後有客造之更進五升乃大吐一物出如升大有口形縮縞狀似牛膈客乃令置之盆中以斛二斗復茗澆之此物噲之都盡而

止覺小脹又增五升便悉混然從口中湧出既吐此物遂瘥或問客此何病答曰此病名斛茗瘥

夷堅志載一人自幼好酒片時無酒叫呼不絕全不進食日漸羸瘦或執其手縛柱上將酒與看而不與飲即吐一物如猪肝入酒內其人自此遂惡酒

又鎮陽有士人嗜酒日嘗數斗至午夜飲興一發則不可遏一夕大醉嘔出一物如舌視無痕竅至欲飲時眼遍其上轟然而起家人沃之以酒立盡至日常所飲之數而止遂投之猛火爆烈為十數片士人由是不能飲

震按此種案可助塵談難充診則惟諸病名亦所當知故選其不同者而刪其同者但嗜茗嗜酒尚非怪異如鮮于叔明嗜臭蟲權長孺嗜人爪劉邕嗜瘡痂唐舒州刺史張懷肅左司郎中任正名李棟服人精唐書高仙芝傳載賀蘭進明好啖狗糞明初僧宗泐嗜糞浸芝蔴雜米煮粥駙馬都尉趙輝喜食女人陰精月水南京祭酒劉俊喜食蚯蚓吳江

婦人喜食死尸腸胃此種皆係癖疾惜無有治之者遂作小說傳流至今令人絕倒耳

積塊

顯慶寺僧應公有沉積數年每於四更後心頭痛硬不能安臥須起行寺中習以為常人莫知為何病因求治於戴人戴人令涌出膠涎一二升如黑礬水繼出黃綠水又下之去膿血數升自爾胸中如失巨山飲餌無算安眠至曉

果園劉子平妻腹中有塊如瓢十八年矣經水斷絕諸法不治戴人令一月內涌四次下六次所去痰約一二桶其中有不化之物如菜葉者如爛魚腸者覺病積如刮漸漸而平及積既盡塊痕反窪如白畧無少損至是面有童色經水復行修弓杜匠其子婦年三十有孕已歲半矣每發痛則召收生媪以為將產也一二日復故凡數次乃問戴人戴人診其脉濇而小斷之日塊病也非孕也脉訣所謂溢脉如刀刮竹行主丈夫傷精女人

敗血。治法下有病當瀉之。用舟車丸百餘粒。後以調胃承氣湯加當歸桃仁。三兩日。又以舟車丸。桃仁承氣湯。瀉青黃膿血。雜然而下。每更衣。以手向下推之。揉之。則出後。二三日。又用舟車丸。猪腎散。通經散等。連下數日。俟清明。當未食時。以針瀉三陰。交不再旬。病已失矣。

震按子和此種治驗約十餘條。其載脉象也不曰沉細。則曰沉遲。此條則曰小而濇。而其用藥也。積在上者。茶調散。三聖散。瓜蒂散。為主。積在下者。舟車丸。神祐丸。承氣湯。通經散。為主。積在中者。兼而用之。凡吐下約數十次。盈五六缶。此種病人。豈非項籍樊噲之流。亞耶然。如樊將軍鴻門會。切生彘肩。啖之。又當怒時。不見其成積也。故曰壯盛人無積。虛人則有之。潔古養正積自除之論。最有見識。何麻知幾輩。侈張其說。以惑世誣民耶。

又按子和係睢州人。河南水土厚實。或有此理。後人師其意。而用倒倉法。亦以吐瀉去積。王金壇極贊之。謂腸胃中得肉液。充滿流行。如洪水。

泛漲浮槎陳朽皆推逐蕩漾而出。沉疴悉去矣。然徐東皋曰。此法惟宜用於元氣實者。若虛損勞瘵鼓脹反胃真病已成。六脉無力者。皆不可用。予見不善用者。往往殺人。觀此說益惕然。於三聖三花輩之難以輕試矣。

陳自明云。予族子婦腹中有大塊如杯。每發痛不可忍。予診之。知為血瘕。投黑神丸盡三丸。塊氣盡消。終身不復作。

震按黑神丸載在濟陰綱目。以彈子大一丸。分四服。據云。瘕氣十服。膈氣癥瘕五服。血瘕三丸。當瘕想係神效之方。并註漆有飛補之力。但世間有一種人。沾染漆氣。即患漆瘡者。若誤投之。寧不為害。所當慎也。予又見一婦。先因痞塊。經閉。里醫用生漆濃塗紙上。陰乾。煨灰。同諸行血藥服之。數服後。頓下鮮血盈桶。遂困憊不堪。就予治。雖大進補劑。終淹成弱證而死。所謂飛補者。安在哉。

丹溪治一婦人。死血食積。痰飲成塊。或在兩脇。動作腹鳴。嘈雜眩暈。身熱。

時發時止用黃連一兩用茱萸益智各炒其半去茱益不用香附童便浸查肉各一两蘿蔔子一两五錢三稜莪朮俱醋煮桃仁留尖去皮青皮麥芽麩山梔台芎各五錢炒為末炊餅丸服

又治呂宗信年六十素好酒因行暑途得疾足冷過膝上腕有塊如拳牽引脇痛不可眠飲食減半卻不渴已自服生料五積散三貼朱診之六脉俱沉瀼而小按之不為弱皆數右甚大便如常小便赤色遂用大承氣湯將大黃炒熟加黃連乾葛芎芍甘草作湯以萸仁黃連半夏貝母為丸至二十貼塊減半遂止藥至半月飲食復進諸證悉除

丹溪曰一婦年四十餘面白形瘦性急因有大不如意乳房下帖肋骨間結一塊漸長掩心微痛膈悶口苦飲食減四之三兩手脉微而短瀼予知其月經不來矣為之甚懼勿與治思至半夜其人尚能出外見醫梳妝言語如舊料其尚有胃氣遂以人參白朮當歸川芎佐以氣藥大劑與之外用琥珀膏貼塊上防其塊長兩三月間約服二百帖食及平時之半脉漸

充仍與前藥吞潤下丸。又百餘貼。月經行不及兩日而止。溢脉減三分之四。時天氣熱。意其經行時必帶紫色。仍與前藥加醋炒三稜吞潤下丸。以抑青丸十五粒佐之。又經一月。塊消其半。月經及期尚欠。平時半日飲食甘美如常。但食肉不覺爽快。予令止藥。且待來春木旺時。區處至次年六月。忽報塊一夜大作。比舊反加指半。脉畧弦。左略怯于右。至數日平和。自言飽食後則塊微悶。食行却自平。予意其必有動心事。激之。問之果然。仍於前藥中加炒黃芩黃連。以少木通生薑佐之。去三稜煎湯吞潤下丸。外以琥珀膏貼之。半月經行而塊散。此是肺金為火所燥。木邪勝土。土不能運清濁。相干。舊塊輪廓尚在。皆因氣血未能盡復。故濁氣稍留。舊塊復起也。補其血氣。使肺不受邪。木氣平而土氣正。濁氣行而塊自散矣。

又一婦人年三十六。家貧多勞。性褊急。自七月經斷。八月小腹下有塊。偏左如掌大。塊起即痛。至半月後。腹漸腫脹。食減。夜發熱。其脉十月間得虛微短澹。左尤甚。初與白朮一觔。和白陳皮半觔。作二十貼煎服。外以三聖

膏貼塊上。經宿則塊軟。再宿則塊小。近下一寸。旬日後。食進熱減。又與前藥一料。加木香三兩。每貼研桃仁九箇。盡此劑。病除。

丹溪又曰。一婢色紫。稍肥。性沉多憂。年四十。經不行三月矣。小腹當中一塊。漸如炊餅。脉皆濇。重按稍和。塊按則痛甚。試捫之高半寸。與千金硝石丸至四五次。彼忽自言。乳頭黑。且有汁。恐是孕。予曰。濇脉無孕之理。又與三五貼。脉稍虛豁。予悟曰。藥太峻矣。令止前藥。用四物湯倍白朮。佐以陳皮炙甘草。至三十貼。候脉充。再與硝石丸至四五次。忽自言。塊消一暈。便令勿與。又半月。經行痛甚。下黑血近半升。內有如椒核者數十粒。而塊消一半。又來。索藥。曉之曰。塊已破。勿再攻。但守禁忌。次月。經行當自消盡。已而果然。大凡攻擊之藥。有病即病。受之邪輕。則胃受傷矣。夫胃氣清純。中和者也。惟與穀肉菓菜相宜。藥石皆偏勝之氣。雖參芪性亦偏。況攻擊者乎。此婦胃氣弱。血亦少。若待塊盡而卻藥。胃氣之存者幾希矣。又一婦因經水過多。每用瀉藥。致氣痛。胸腹有塊。十三枚。遇夜痛甚。脉濇而弱。丹溪曰。

此因瀆藥致敗血不行用蜀葵根煎湯再煎參朮青皮陳皮甘草稍牛膝入元明粉少許研桃仁調熱服二貼連下塊二枚以其病久血耗不敢頓下乃去葵根明粉服之塊漸消

震按丹溪諸案消補兼施而佐清肝者居多間有用攻擊者內經所謂大積大聚其可犯也又不得矯子和之弊而一味培補反蹈養癰養寇之害但丹溪用藥輕重次第各合機宜非比子和千篇一律

王金壇曰予內弟于中甫飲茶過度且多憤懣腹中常漉漉有聲秋來發寒熱是瘧以十棗湯料黑豆煮晒乾研末棗肉和丸芥子大而以棗湯下之初服五分不動又服五分無何腹痛甚以大棗湯飲大便五六行皆溏糞無水時蓋晡時也夜半乃大下數斗積水而疾平當其下時瞑眩特甚手足厥冷絕而復甦舉家號泣咸咎藥峻嗟乎藥可輕用哉

張三錫曰曾治一少年體薄弱且咳血左邊一塊不時上攻作痛左金蘆薈俱不應診其脉三部雖強而細瀆不流利因作陰虛治四物加知礬元

參丹皮不六劑頓愈。此陰虛是肝積也。由此推之。雖因部分名積。診視之際。猶當詳審。惟圓機者。乃不昧此。

震按此二條一係飲積以證與因斷之一係陰虛似肝積以脉斷之。卽圓機也。兩家垂訓裨益尤多。

喻喜言治袁聚東年二十歲生痞塊。日進化堅。削痞之藥漸至毛痺肉脫。面顰髮卷。殆無生理。喻視之。少腹臍旁三塊。堅硬如石。以手拊之。痛不可忍。其脉兩尺洪盛。餘俱微細。謂曰。此由見塊醫塊。不究其源而誤治也。初起時塊必不堅。以峻猛之藥攻至真氣內亂。轉護邪氣為害。如人廝打。紐結一團。迸緊不散。其實全是空氣聚成。非如女子月經凝而不行。卽成血塊之比。觀兩尺脉洪盛。明是腎氣傳于膀胱。因服破氣藥多。膀胱之氣不能傳前後二便而出。乃結為石塊耳。治法須內收腎氣。外散膀胱之氣。以解其廝結。三劑可愈也。先以理中湯加附子五分。塊卽減十之三。再用桂附大劑。腹中氣響甚喧。三塊一時頓沒。然有後慮者。腎氣之收藏未固。膀

膀胱之氣化未旺。倘犯房室。塊必再作。乃用補腎藥加桂附多。加河車為丸。取其以胞補胞。而助膀胱之化源也。服之後。方不畏寒。腰圍漸大。年餘且得子。

震按此人尅伐太過。換以溫補未足。為奇。惟兩尺脈洪盛。非此詮解。誰不面墻。至於桂附河車同補腎藥。為善後計。則與腎氣傳膀胱之論。緊切不泛。非通套治痞成法可比。

李士材治郡守于鑑。如每酒後腹痛。漸至堅硬。得食輒痛。李診之。曰脈浮大而長。脾有大積矣。然兩尺按之軟。不可峻攻。令服四君子湯七日。投以陰陽攻積丸三錢。但微下。更以四錢服之。下積十餘次。皆黑而靛者。察其形不倦。又進四錢。于是腹大痛。所下甚多。仍服四君子湯十日。又進丸藥四錢。去積三次。又進二錢。下積至六七碗。脈大而虛。按至關部豁如矣。乃以補中益氣調補一月。全愈。

震按脈浮大而長。為脾有大積。較之丹溪諸案。或沉澹而小。且數。或微

而短澹或虛微短澹或脉澹而弱者大不同矣須於臨證時能以古人各種脉法俱為我之正鵠庶期中的若兩尺按之軟不可峻攻固是正理然亦要看得靈變蓋兩尺軟為虛則喻案之兩尺洪盛寧不認為實而峻攻之耶故又當以形色及病情參討也

給練侯啟東腹中嘈痛士材按其左脇手不可近凡飲食到口喉間若有一物接之者然李曰脉大而數腹痛嘔涎面色痿黃此虛而有溼溼熱相兼蟲乃生焉當煎人參湯送枳黃丸以下蟲積蟲若不去雖補何益乎病者畏不敢用後竟不起

震按此是蟲積猶之飲積俱無塊者耳彼肯服十棗丸而愈此不肯服枳黃丸而殂因知病之宜補宜攻總貴用其所當用誠不可專守潔古之說為穩着也

周慎齋治一婦素善怒左脇下有塊身肥大經將行先一二日且吐且下此肝木乘脾脾虛生痰不生血也善怒脇塊肝氣亢也吐下者脾氣虛也

身肥則多痰痰盛者中焦多溼故經行時氣血流通冲動脾溼且吐且下也久而不治必變中滿宜理脾燥溼白朮一兩半夏五錢生薑七錢沉香二錢共末白糖和服

一人左脇下有塊右關脉豁大周用烏藥一兩以附子五錢濃煎製之將烏藥日磨二三分酒送下俟積行動乃以補中益氣湯加附子服之丸用六君子

震按慎齋書云凡積不可用下藥徒損真氣病亦不去當用消積藥使之鎔化則除根矣積去須大補誠格言也卽此二案亦平淡之神奇又嘗考消積之方如桃仁煎用大黃蝨蟲芒硝黑神丸用生漆熟漆東垣五積丸俱用川烏巴霜局方聖散子三棱煎丸俱用礪砂乾漆此皆峻厲之藥用而中病固有神效若妄嘗輕試鮮不敗事矣千金硝石丸人參硝黃並用丹溪猶以為猛劑治婢一案每與補藥迭進此真善治病者也丹溪治積聚案有數十條輕重曲折適至病所惜不能多載再閱

葉氏醫案積聚門祇用雞肫皮萊菔子蛤粉芥子蜣螂塵蟲青朴等並
無古方狠藥其理尤可想見予曾親見葉先生治一婦產後着惱左邊
小腹結一塊每發時小腹脹痛從下攻上膈間乳上皆痛飲食入胃卽
吐遍醫不效先生用炒黑小茴香一錢桂酒炒當歸二錢自製鹿角霜
一錢五分生查肉三錢川芎八分菟絲子一錢五分水煎送阿魏丸七
分八劑而愈次用烏鷄煎丸原方半料永不復發又一人患瘧疾補早
左脇成痞連於胃腕按之痛甚用炒桃仁為君佐以阿魏穿山甲鱉甲
麝香丸服全消此二條較之臨證指南所載者為更佳故附于此予又
親見杭州一富家婦患痞塊用黑神丸大效每痛作嘔脹不堪服此卽
愈數十服後百苦皆除然半年外以他病暴殞因思漆身為癩之言臟
腑豈堪常漆耶清純沖和之氣耗喪於此藥而不覺也再觀丹溪治方
提領用參朮歸芍等煎湯下保和丸二十五龍薈丸十五治馮氏女
用左金丸青六丸後用參橘桃芍丸治盧子裕瘧後食酒肉而成

左脇用參朮柴苓枳殼煎湯下阿魏五保和二十抑青十與點十玫瑰
五玫瑰者青皮三稜桃仁桂枝海藻醋調神麴為丸也治下邳錢郎用
保和二十溫中二十抑青十以白朮木通三稜湯下此等方法皆補藥
與磨積相半而必兼清肝之藥大抵因怒成塊者居多也又如陳里長
男飽食牛肉豈腐成塊在右脇脉弦而數即明告以此人必性急塊上
不可按按則愈痛痛則必吐酸黃苦水而用荔枝山查枳實山梔茱萸
人參薑汁以止痛繼用皂角煎汁製半夏合黃連石城用糖球膏為丸
以消塊此仍是治肝為主磨積為助學者能逐案細繹之自有悟處
王海藏載萬病紫苑丸云李靈惠肥氣日服五丸經一年瀉出肉鱉二
枚愈李知府妻梅氏帶下血崩七年骨痿着床日服五丸至十九丸取下
肉塊如雞子狀愈以及趙侍郎瀉出青蛇七條王氏瀉出癩蟲如馬尾
者二升今覽其方巴霜川烏甚少餘如人參黃連皂莢川椒等皆平庸
藥不若耆婆萬病丸之芫花甘遂蜈蚣元青石蜥蜴等之有毒也何以

能著奇功惜未試之

又按阿魏丸方甚多如醫林阿魏十四味內有石城風化硝小阿魏丸七味乃稜蓬胡椒青皮木麝二香心統消積阿魏丸共八味內有三稜莪朮牽牛穿山甲丹溪阿魏丸治肉積者只四味又醫林小阿魏丸卽丹溪治陳里長男之三味卻無阿魏猶之琥珀膏只大黃朴硝各一兩為末以大蒜搗膏貼之並無琥珀也總須對證擇用之

前陰病

東垣治一人前陰臊臭又因連日飲酒腹中不和求治曰夫前陰者足厥陰肝之脈絡循陰器出其挺末凡臭者心之所主散入五方為五臭入肝為臊當于肝經瀉行間是治其本後于心經瀉少冲乃治其標如惡針當用藥除之酒者氣味俱揚能生裏之溼熱是風燥熱合于下焦為邪經云下焦如瀆又云在下者引而竭之酒是溼熱之物亦宜決前陰以去之治以龍膽瀉肝湯又治陰邪熱痒柴胡稍二錢澤瀉二錢車前子二錢木通

五分。生地黃當歸稍草龍膽各三分。作一服水煎以美膳壓之。

震按龍膽瀉肝湯治前陰病之由於溼熱者。今人亦因此案而知之。然此案分兩之輕重與此病則為恰合。非不可移易之數。又當隨病情損益為妥。

丹溪治一人年少玉莖挺長腫而痿。皮塌常潤。磨股不能行。二脇氣上冲。先以小柴胡加黃連大劑行。其溼熱次。又加黃檗降其逆上之氣。挺腫漸收。及半。但莖中有一堅塊未消。遂以青皮為君。佐以散風之劑。為末服之。外以絲瓜汁調五倍子末傅之。而愈。

一人色蒼黑年五十餘。素善飲。忽玉莖堅挺。莫能沾裳。不可屈腰。作揖常以竹篋為灣弓狀。攔于玉莖之前。但小溲後即欲飲酒。否則氣不相接。蓋溼熱流入厥陰經。而然也。專治厥陰溼熱而愈。

震按此亦龍膽瀉肝湯證。上案之用小柴胡加黃連者。以兩脇氣上衝也。下案不認作肝火濕熱。洵是高手。於此見辨病宜詳細。不容少涉模

糊

一婦產後因子死經斷不行者半年一日少腹忽痛陰戶內有物如石硬塞之而痛不禁眾醫不識青林曰此石瘕病也用四物加桃仁大黃三稜枳榔元胡索附子澤瀉血竭為湯二劑而愈

薛立齋治一婦人胸膈不利內熱作渴飲食不甘肢體倦怠陰中悶痒小便赤澀此鬱怒所致用歸脾加山梔芎歸芍藥而愈但內熱晡熱用逍遙散加山梔亦愈後因勞役發熱患處脹腫小便仍澀用補中益氣加山梔茯苓丹皮而愈

一婦人陰中突出如菌四圍腫痛小便頻數內熱晡熱似痒似痛此肝脾鬱結之病蓋肝火溼熱而腫痛脾虛下陷而重墜也先以補中益氣加山梔茯苓車前青皮以清肝火升脾氣漸愈更以歸脾湯加山梔茯苓川芎調理更以生豬脂和黎蘆末塗之而收

一婦人陰中挺出一條五寸許悶痛重墜水出淋漓小便澀滯夕與龍膽

瀉肝湯。分利溼熱。朝與補中益氣湯。升補脾氣。諸證漸愈。再與歸脾。加山梔。茯苓。川芎。黃芩。間服。調理而愈。後因勞役。或怒氣。下部溼痒。小水不利。仍用前藥而愈。亦有尺許者。亦有生諸蟲物者。用此法治之。

一婦人陰內痛痒。內熱倦怠。飲食少思。用參。芪。歸。朮。陳皮。柴胡。炒。梔。車前。升麻。芍藥。丹皮。茯苓。治之而愈。若陰中有蟲痒痛。亦屬肝木。以桃仁研和雄黃末。納陰中以殺之。仍用清肝解鬱。或以雞肝納之。取蟲之法也。

立齋又曰。余奉侍武廟湯藥。勞役過甚。飲食失節。復兼怒氣。次年春。莖中作痒。時出白津。時或痛甚。急以手緊捻乃止。此肝脾之氣虛也。服地黃丸。及補中益氣。加黃芩。柴胡。山梔。茯苓。木通而愈。丁酉九月。又因勞役。小便淋瀝。莖痒竅痛。仍服前湯。加木通。茯苓。膽草。澤瀉。及地黃丸而愈。

一男子莖中痛。出白津。小便秘。時作痒。用小柴胡。加山梔。澤瀉。炒。連。木通。膽草。茯苓。二劑頓愈。又兼六味。地黃丸而瘥。

震按立齋諸案治法詳備。可補東垣丹溪之未逮。且以補藥解鬱平肝。

又開一局蓋院使擅長於補其用參芪歸朮如布射僚丸百發百中也
末案純用清理又知其非一味蠻補者

附一男子陰腫大如升核痛醫莫能治搗馬鞭草塗之而愈

一人莖頭腫大如升光如水泡以二陳加升麻青黛牡蠣二劑而愈

一人玉莖硬不痿精流不歇時如針刺捏之則脹乃為腎滿漏疾用韭
子破故紙各一兩為末每三錢日三服即止

一人在山亭裸體而卧其陰莖被飛絲纏繞陰頭腫欲斷以威靈仙汁
入水浸洗而愈

陽痿

周慎齊治一人年二十七八奇貧鰥居鬱鬱不樂遂患陽痿終年不舉温
補之藥不絕而證日甚火升于頭不可俯清之降之皆不效服建中湯稍
安一日讀本草見蒺藜一名旱草得火氣而生能通人身真陽解心經之
火鬱因用斤餘炒香去刺成末服之效月餘諸證皆愈

張景岳曰。余嘗治一強壯少年。遭酷吏之恐。病似脹。非脹。似熱。非熱。絕食而困。眾謂痰火。宜清中焦。余診之曰。此恐懼內傷。少陽氣索。而病及心腎。大虧證也。遂峻加溫補。兼治心脾。一月而愈。愈後雖形健如初。而陽寂不舉。余曰。根蒂若斯。腎傷已甚。非少壯所宜之兆。速宜培養心腎。庶免他虞。彼不肯信。未及半載。竟復病而歿。可見恐懼之害。其不小者如此。

附一少年新婚。欲交媾。女子阻之。乃逆其意。遂陰痿不舉者五七日。以禿筆頭燒灰。酒下。二錢而起。

震按。巢氏病源。以腎間動氣為人之根本。故老年而能御女。七十歲至八十歲猶生子者。其動氣之稟於生初者。獨厚也。厚則剛陽自不痿。生子之時。已是大壽。至不能生子而死。諒必又有數年。豈非耄耋乎。亦有六十歲左右。即陽痿者。必不能至大壽。須任其自然。絕意淫慾。尚可延齡。設以興陽藥內服外洗。求為御女之事。不數年而死矣。又如壯年無病。而陽痿。其人多天。少年虛損而陽痿。其死立至。皆由腎間動氣早衰也。

動氣即命門真火。所以生長元氣。煦燠元陰。故氣曰陽氣。精曰陽精。其盈虧俱得於先天。盈者雖斷喪而無傷。虧者雖葆養而不足。並非藥石所能擴充。乃扁鵲新書載王超老淫故事。而云保命之法。灼艾第一。丹藥第二。附子第三。此說荒唐。斷不可信。又考宗筋聚於前陰。前陰者足之三陰。及陽明少陽衝任督躋九脉之所會。而九脉之中。陽明為之長。內經云。陽明者。五臟六府之海。主潤宗筋。所以胃強善啖之人。其於慾事必強。反是則痿而不舉。或舉而不堅。是胃氣能為腎氣之助。古云。精生於穀。又云。男子精盛則思色。其道理可喻矣。新書之言。不過如宋人握苗耳。况丹藥之害。可勝言哉。

陰吹

張路玉治一僕人之婦。經閉三月。少腹痛貫徹心。而陰吹不已。與失笑散一服。瘀血大下。遂不復作。

又治一貴婦。小產後寒熱腹痛。亦病陰吹。與山查炭熬焦。黑糖為丸。用伏

龍肝。煮水澄清煎獨參湯送三錢一服結糞大下再進瘀血續行而愈始悟猪膏髮煎實為逐瘀而設也。

附一婦人陰腫堅硬用枳實八兩碎炒令熱故帛裹熨冷則易之。

脫肛

東垣治一女子脫肛用糯米一勺濃煎飲去米候溫洗肛溫柔卻先以磚一片火燒通紅用醋沃之以青布鋪磚上坐肛于青布上如熱則加布令厚其肛自吸入而愈。

附一人大腸頭出寸餘乾即自脫落隨又出名截腸病用芝麻油器盛坐之飲大麻子汁數升愈。

薛立齋治余時正素有痔每勞役脫肛腫痛出水此中氣下陷用補中益氣加茯苓芍藥十餘劑而愈。

震治一人脫肛腫痛出水尺脉洪數用樗根白皮川槿訶子肉沒石子鱉頭灰而愈其人好酒形實乃濕熱下注非氣虛下陷也。

痔

一婦產後痔作瘡有頭如赤豆大或下鮮血或紫血大便疼與黑神散又多食肉太飽溼熱在大腸所為以郁李仁去皮麻仁槐角各七分枳殼皂角仁各五錢蒼朮歸尾生地各三錢大黃炒一錢六分煎服

震按此方與酒煮黃連丸及臟連丸皆治痔痛下血之正法也餘如乾柿燒灰飲下四時取其方柏葉燒灰調服亦佳而道場慧禪師所云平直量骨脊與臍平處椎上灸七壯或年深更於椎骨兩傍各一寸灸如上數無不除根者此法猶可試若駱谷驛吏用柳枝煎濃湯洗痔隨以艾炷灸痔上三五壯因大瀉鮮血穢物極痛楚而痔隨泯迹此則不敢輕試者矣予一徐姓友先患內痔復生外痔外則腫痛出膿血內又脹痛異常每登園後內痔墜出欲捺之進內碍於外痔欲俟其自收則相抵痛極以致行坐不得晝夜側卧而已內服芩連槐花等藥外抹熊膽及冰片田螺水等法總不應痛甚汗多困乏稍進人參則痛益加無計

令其製服計服豬膽二十枚而內外之痔亦皆泯迹

陸上舍冬患痔作痛右寸浮大左寸口洪數立齋曰冬見夏脉當壯水之主以鎮陽光彼以為迂別服苓連之劑薛謂其姪曰令舅氏腎水不能生肝木歿於春驗矣今令叔腎水不能制心火當歿於夏至甲辰六月薛復視之痰涎上湧日夜不寐脉洪大而數按之無力左尺絕無足膝肩膊逆冷薛曰事急矣彼云但求少延數日以待嗣子一見始用參芪歸朮炮薑之類及六味丸料加肉桂至本月而歿五行之理信然

瘴氣

陳三農治制府王姓感胃瘴氣寒熱頭疼胸膈飽悶眩暈惡心脉數而洪用霍香正氣散加厚朴檳榔羌防蘇葉一劑而寒熱退頭不疼減去羌蘇防風加草豆蔻半夏枳殼惡心脹悶皆愈

又治梧州方姓頭疼身痛發熱惡心飽悶脉弦而數用羌防芎蘇藿半夏檳榔蒼朴橘草二服而減因飽脹未全退加草果草豆蔻方愈要知惡心飽

脹。乃瘴氣之異於感冒也。

端州李別駕鑲藍旗人年四十餘能騎射署雷州府時善搏虎不避風雨寒暑涉溪陟嶺染瘴已深其所感風寒暑溼不一而足矣又以謝謁上臺到省過勞積邪所感猝然皆發醫者畧為解散卽用補劑而邪氣大作寒熱神昏譫語脉空數無根神氣散亂補瀉兼施毫無一效三農診之脉如水上羹刻刻欲脫寒熱間作蓋受病既深精氣兩虛邪氣正熾法在不治勉擬五積散加附子人參去麻黃而易羌活其家見立方有難色置不用後醫有認陰瘧陽虛而進金匱腎氣加參者有謂虛證似瘧而以補中倍加參附者三劑而神昏氣喘虛汗如雨足冷而脫矣不知此證初實受瘴氣屢感屢深今則乘虛而發古云傷寒偏死下虛人况瘴氣而風寒暑濕備感者乎。

兩廣總制石公子年甫十齡六月感冒風暑寒熱頭疼已用葛根加羌防解表矣後復寒熱不減氣喘腹脹再用小柴胡湯加消導不應神昏喘急

寒熱間作時或泄瀉似痢腹痛不知名為何病也陳往視已二十餘日矣脈數無力神氣昏亂舉家驚惶按其腹時痛時脹觀其神時靜時躁手足或冷或熱虛汗不已此外邪初感者為藥而解久積者未曾清理加之飲食失調元氣欲脫故虛象顯露細思外邪內陷變病之證元氣已虧救本為急且扶住元神再籌治病之策因用理中湯加桂附腹痛稍緩泄瀉頓減手足亦煖然發熱不退小便赤濁不利因用金匱腎氣丸作湯二服小便方利寒熱愈加此元氣漸回病證乍現風寒暑溼食積種種不清若欲返本還元正爾變端不一仍朝用六君子湯加柴胡乾葛神麴乾薑夜用六味湯加參桂旬日後寒冷拘攣眼目翻白咬牙呻吟舉家驚恐慟哭以為無救矣陳曰此名寒戰正氣將回積邪欲出從此一變反有復生之機自未至酉始得大汗如雨手足輒怠不語熟睡人情雖少定而錯愕未安也天明方能言語然虛證日變潮熱汗多則用補中合建中加附子不能安寢則用歸脾湯元氣弱則用十全大補湯腹痛滑瀉則用理中六君湯

如是調攝三閱月方得返本還元而奏功也。

震按瘴氣者山嵐鬱毒之氣也何以可用溫補况係髣年外邪正熾而參薑桂附靡不應手奇矣自非熟悉其風土病情者豈敢輕試乎陳三農亦曰此證與江浙楚豫北方各省所患外感內傷迥異總之瘴氣為得病之根變證便爾不同醫家治之當別具手眼靜心揣摩參以各論庶幾有得

正紅旗孫公病已月餘陳診其脈空豁恍惚不定重按無根神昏譫語寒熱大作加之咳嗽痰喘轉側不能晝夜伏几呻吟而已且胸高飽悶足冷惡寒詢知夏秋積勞寒暑皆受一月以前初感頭疼身痛憎寒壯熱咳嗽醫者用桔梗杏仁乾葛羌蘇汗而不解復用桑皮前胡蘇子橘半知貝黃芩亦不應因寒熱更甚有用小柴胡加梔子元參薄荷清痰退熱而咳嗽更甚不知此證夏秋暑溼風寒兼感而發尚未得汗何能解散遂用五積散二劑而得汗如淋咳嗽亦減可以伏枕惟寒熱未退積久病深元氣已

虧氣上喘小便如油短數其火從下而上上盛下虛腎氣虛憊因用金匱
腎氣加沉香二服而氣平便順然潮熱如故時有嚙語人亦忘識乃知精
神耗散極宜大補午後用參附六君湯朝用腎氣丸次序並進經月方思
飲食嚙語亦退虛汗亦止神氣始安方識平日交往之人凡用人參附子
共勛許精神稍復然面目黎赤肌血不華再用還少丹加桂附河車鹿角
膠月餘又用十全大補湯二十餘劑元氣日長而飲食如常矣

震按三農云此與李別駕等一病形彼以不信予藥而殞然則李若信
之亦必用大溫大補也瘴氣有此種治法殊屬可駭或者兩粵地方天
煖溼蒸有發洩而無收藏人之陽氣外越故病重者多以亡陽為治乎
康熙戊寅十一月高齋使公子患似痢非痢紅多白少身惡寒微熱詢知
自夏秋以來由川北隨任之粵久積暑溼感冒而發用平胃加羌防紫蘇
藿香一劑而寒熱退再加檳榔木香而瘳或曰痢疾所忌燥藥今用蒼朮
而愈何也曰常人痢疾因暑令火熱之氣燥藥乃天時之忌故不可用今

以積溼之氣發於隆冬外感乃得力之藥也所謂治病必搜其原耳。梁溪
碁師周西候之弟開銅山於英德其山下有水人浣其衣則膩垢皆去咸
以為奇物也以其近便炊爨亦用之未幾人皆黃胖身軟腹脹而無力飲
食倍進寒熱間作善啖雞豕諸肉則胃腹稍安在廠同事斃者不一因至
省會求救於陳用平胃正氣治其病後以益氣六君補其受毒水尅削之
愆而安此卽粵西太平柳州南寧毒水瘴之一班也。

一時開山同病而返省者數人有陳某似瘧非瘧以瘧治勢漸篤三農診
之脈已細緊而數飲食不進乃曰若欲治之何不於一月以前雖病篤而
元氣尚在今病已深精神殆盡矣何藥可施乎旋斃。

又同事一人似痢非痢寒熱間作醫以香連硝黃消攻清理日劇尫羸因
易一醫曰可以進補用白朮五分茯苓四分陳皮二分病雖不甚熱亦不
減三農診其脈恍然不定重按已絕雖飲食尚可所謂行屍耳邪火浮載
真精告竭矣辭之閱二日而死。

震按瘴氣為病情形不一非親歷其地者莫能知也故所叙諸案不敢妄斷三農久遊兩粵言之甚詳向來諸書未載今錄於後

瘴者障也。天地自然之氣為崇山峻嶺障蔽不舒而然也。再加之以春夏之交。萬物發生之際。乖戾鬱遏。人多染患。是以道路行役者恒多。而安閒居室者恒少也。閩之仙霞。粵之度嶺。陽閉於陰。陽瘴為多。粵西近高雷廉者。粵東之餘氣。證亦相似。其慶遠柳州太平。近於交趾諸郡。千山萬壑。屏障於南。反阻塞其陽。威之氣為山之陽。陰閉於陽。每成陰瘴。陰溼蘊毒。故陰瘴尤重也。

尋常瘴

春夏之交。乍寒寒熱。其氣忽然。翁鬱。忽然發洩。更衣不時。感冒不一。本地人患者不知。醫者無書可考。客寓者每曰水土不服。委之於數而已。其證似風寒頭痛寒熱。而又惡心脹悶似痢非痢。似瘧非瘧者是也。宜九味羌活湯加減。平胃散。藿香正氣散。二陳湯。此證粵中無時無之。無

人覺之。虛弱之體。感而即發。敦厚之人。感不驟發。積久而成。渾渾漠漠。脉證茫然。難治難愈。

暑溼瘴

閩粵皆有之。夏秋之時。久雨陰溼。忽然暑熱。山嵐之氣。自下蒸上。人在氣交之中。有一種脹悶不可當之勢。此卽瘴癘時也。人能知覺者。卽以玉樞丹。水磨服之。立解。平胃散加檳榔亦佳。

毒水瘴

粵西於雲貴接壤處。有水能毒人。其山產五金。皆有毒。況產五色信石者乎。山鵠熬信水流下溪。人不知誤吞。則腹脹絞腸而不救矣。初感而輕。用玉樞丹。紫金錠。行軍散。平胃正氣散。亦有得生者。

黃茅瘴

三四月草深偃俯。久雨溼爛。而時令蒸鬱。其性上炎。一種鬱勃之氣。入虛人口鼻。卽患瘴悶。輕者用平胃藿香正氣散。重者蘇合丸。七香丸。諸

葛行軍散即愈。廣東高雷廉及廣西左右兩江皆有之。

孔雀瘴

五六月雨水泛溢。有孔雀處。其屎積於木葉草間。隨澗水流下。人誤吞之於炊爨間。必患腹脹而痛悶。輕者正氣平胃散。調玉樞丹而愈。重者行軍散。七香散。紫金錠可治之。最重者非藥可解。此廣西慶遠思恩太平近交趾處居多。鎮遠四城州柳州亦有之。

桂花瘴

全州桂林梧州平樂皆有之。八九月間香氣如桂。此瘴最急。觸人口鼻即倒仆。此為中瘴。必須同行之人。就其鼻傍掘一穴。通地氣。亦有得生。但腹痛飽脹頭暈惡心。重者立危。輕者平胃正氣散。下玉樞丹而活。有善避者。見有黑氣如霧。其香必至。即剗一地穴。以身俯地上。口鼻向土潭穴中。勿使香氣入穴。即解矣。其氣不及一餉即散。故此地人枵腹行路。必用大蒜燒酒。亦避之之意。或先以行軍散搐鼻亦妙。又近雲南

交趾地方。有糯米餅香。即病而絕。俗名江米瘴。亦可類治。

蚯蚓瘴

二三四五月。泥水汎濶。人犯之。腹脹疼楚。如蚯蚓狀者。青筋蟠現於肚腹。興起痕高。輕則以蒜搗汁。及土漿敷腹。亦用玉樞丹。紫金錠。薑汁灌入。次進蘇合七香以通之。

蚘蛇瘴

三四月五六月七月。蚘蛇交媾穢濁之氣。順水流下。人或犯之。胸腹脹痛異。常口鼻有腥氣。輕則紫金錠。玉樞丹。行軍散。蘇合丸。用之。亦有得生重者。一。二。日即死。

大凡治病之道。寒證用熱藥。熱證用寒劑。人所共曉。此如舉業題之正。面易做。而側取為難。更有外有餘而內不足。有內真實而外假虛。陽證似陰。陰證似陽。其中精微深奧之處。差之毫釐。繆以千里。瘴癘雖從山川地氣。隨時令而得。亦必乘人本虛。方乃受病。其陽虛火衰者。一時受

瘴因輕而不覺。瘴證變為本病，必虛寒而腹脹滿，大便泄瀉，惡寒手足冷者是也。陰虛火旺者，瘴輕而不覺，瘴後現為本病，必頭暈口渴發熱，腹脹惡心便赤者是也。再審五臟六腑各有素常，偏患衰弱壯實之分，皆當以此類推。并須消息其夏秋勞逸行役陰晴暑溼起居所履庶幾有得。至如瘴脉初感洪數，虛者大而芤實者弦而滑，久則變遷亦總以無力為虛，有力為實也。

震按三農治瘴之方與古方微有不同，將來刊於古今經驗方按此不及錄。與治瘴相宜，若仍古方之舊者不錄。

吾吳地有痧氣，夏月更多，或腹痛或脹悶昏仆，若不救之亦立死。此與瘴氣病情倣佛，刮痧放痧以行軍散點眼以痧藥及紫金錠灌喉皆可立愈。並非疑難證，不必更立一門而有侈張其說者。如王養吾著晰微補化全書立六十四卦象方，至謂各種雜證多由痧氣變遷成案亦富。然不外散風清暑豁痰消瘀破氣攻結諸法，而牽扯入痧徒滋眩惑不

足取也較之吳又可溫疫論指諸雜證為疫同一附會耳

古今醫案按卷第八終

